



KEMENTERIAN PERPADUAN NEGARA

TEKS UCAPAN

**YB DATUK AARON AGO DAGANG
MENTERI PERPADUAN NEGARA**

SEMPENA

**MAJLIS KARNIVAL DAN PENYAMPAIAN HADIAH HARI
BAHASA IBUNDA ANTARABANGSA 2025**

14 JUN 2025

10.30 AM

**ASIA PACIFIC UNIVERSITY OF TECHNOLOGY &
INNOVATION (APU) KUALA LUMPUR**

Salam Malaysia MADANI dan Salam Perpaduan.

SALUTASI

****(salutasi terkini disediakan secara berasingan)***

KATA ALU-ALUAN

1. Bersyukur, kita dapat bersama-sama berhimpun dalam suasana penuh makna dan kesedaran untuk memperingati **Hari Bahasa Ibunda Antarabangsa 2025**.
2. Saya mengambil kesempatan ini untuk merakamkan setinggi-tinggi penghargaan kepada pihak penganjur dan semua yang hadir, atas kesungguhan dan komitmen dalam menjadikan sambutan ini bukan sekadar satu acara simbolik, tetapi satu gerakan jiwa untuk menghargai warisan bahasa dan menyemai semangat perpaduan nasional.
3. **Sambutan Hari Bahasa Ibunda Antarabangsa ini mula diiktiraf oleh UNESCO pada tahun 1999** sebagai memperingati pengorbanan sekumpulan pelajar di **Dhaka, Bangladesh pada 21 Februari 1952** yang telah gugur mempertahankan hak untuk bertutur dalam bahasa ibunda mereka, bahasa Bengali. Peristiwa ini

membuka mata dunia bahawa bahasa bukan hanya isu linguistik, tetapi isu hak asasi manusia.

4. **Setiap bahasa ibunda adalah cerminan identiti dan akar budaya sesebuah komuniti. Ia bukan sekadar alat komunikasi, tetapi merupakan wahana menyimpan nilai, adat, sejarah, dan cara fikir sesebuah masyarakat. Tanpa bahasa, hilanglah jati diri. Tanpa jati diri, goyahlah tamadun.**

Hadirin yang saya hormati sekalian,

BAHASA DAN PERPADUAN: SUATU IKATAN SOSIAL YANG HAKIKI

5. Di Malaysia yang berbilang kaum, budaya dan agama, **bahasa ibunda merupakan tiang penting yang menyokong struktur kemajmukan masyarakat kita.** Bahasa adalah identiti, dan dalam konteks negara ini, setiap bahasa ibunda membawa warisan yang unik serta menyumbang kepada kekayaan budaya nasional.
6. **Perlembagaan Persekutuan, khususnya Perkara 152, dengan jelas memperuntukkan bahawa Bahasa Melayu adalah bahasa kebangsaan negara. Ini merupakan asas perpaduan nasional, simbol kepada jati**

diri bersama yang dikongsi oleh seluruh rakyat Malaysia. Namun pada masa yang sama, **Perlembagaan turut menghormati hak-hak semua warganegara untuk menggunakan, mempelajari dan memelihara bahasa ibunda masing-masing.**

7. Bahasa Melayu sebagai bahasa kebangsaan adalah tunjang penyatuan nasional, namun bahasa-bahasa ibunda lain seperti **Mandarin, Tamil, Iban, Kadazan Dusun, Semai** dan pelbagai lagi turut dihargai dan diiktiraf sebagai sebahagian daripada warisan bangsa. **Bahasa-bahasa ini memperkayakan identiti negara kita, mencerminkan jiwa masyarakat majmuk yang saling lengkap-melengkapi.**

8. Inilah keunikan Malaysia. **Kita tidak menafikan perbezaan, malah kita mengangkatnya sebagai asas pembinaan negara bangsa. Kita tidak memaksa keseragaman, tetapi kita mendidik kepada kefahaman, penghormatan dan penerimaan.** Justeru, bahasa tidak harus menjadi sempadan, tetapi jambatan yang merapatkan jurang antara komuniti.

9. Selaras dengan semangat ini, kerajaan melalui pelbagai kementerian dan agensi termasuk Kementerian Perpaduan Negara, Kementerian Pendidikan, Kementerian Pendidikan Tinggi dan Kementerian Komunikasi terus memainkan peranan aktif dalam memperkasa bahasa ibunda melalui pelbagai inisiatif.

10. Semua **usaha ini adalah cerminan komitmen kerajaan untuk memastikan bahasa-bahasa ibunda terus hidup dan berkembang**, bukan sahaja dalam kalangan generasi tua, tetapi turut disemai dalam jiwa generasi muda sebagai sebahagian daripada warisan dan identiti Malaysia yang kita cintai bersama.

Hadirin yang saya kasihi sekalian,

KONSEP FAHAM, HORMAT DAN TERIMA

11. Dalam kerangka **Malaysia MADANI**, perpaduan tidak lahir daripada keseragaman, tetapi daripada keupayaan kita untuk **memahami perbezaan, menghormati keunikan, dan menerima keragaman** sebagai sumber kekuatan. Bahasa ialah medan pertama di mana proses ini berlaku.

12. Selain itu, apabila anak-anak kita belajar mengenali dan menghormati bahasa ibunda rakan-rakan mereka, mereka juga sedang belajar memahami budaya, nilai dan sejarah masyarakat lain. Apabila kita mempelajari pantun Melayu, peribahasa Tamil, simpulan bahasa Cina, atau cerita rakyat Orang Asli, kita sedang membina jambatan empati yang menghubungkan hati.

13. **Golongan belia hari ini memegang amanah besar sebagai penjaga khazanah bahasa masa depan.** Dalam dunia yang semakin pantas bergerak dengan arus teknologi, bahasa ibunda kerap kali terpinggir bukan kerana hilang nilainya, tetapi kerana kita semakin leka dalam keselesaan bahasa asing yang lebih dominan dalam ruang digital dan profesional.

14. Namun, saya tetap optimis. **Saya percaya bahawa belia Malaysia memiliki daya tahan budaya dan jiwa kebangsaan yang utuh.** Mereka bukan sahaja celik teknologi, tetapi juga semakin sedar akan pentingnya memelihara akar warisan bangsa termasuk bahasa ibunda mereka.

15. Justeru, **saya menyeru agar belia Malaysia bangkit sebagai ejen penghidup Bahasa** bukan sekadar pewaris pasif, tetapi penggerak aktif yang menghidupkan kembali roh bahasa dalam kehidupan seharian. Dan yang paling utama, **berbanggalah bertutur dalam bahasa ibunda sendiri**, tanpa rasa malu, tanpa rasa rendah diri. Kerana bahasa bukan sekadar bunyi dan kata. Ia adalah warisan. Ia adalah identiti. Ia adalah jiwa bangsa.

Hadirin yang saya muliakan sekalian,

PENUTUP

16. **Jika akar pohon adalah bahasa, maka batangnya adalah budaya, dahannya adalah identiti, dan buahnya adalah perpaduan.** Maka wajiblah bagi kita semua menjaga akarnya agar pohon Malaysia ini terus subur dan berbuah, memberi naungan kepada semua warganya, tanpa mengira bangsa, agama atau latar keturunan.

17. **Bahasa ibunda bukan hanya warisan, ia adalah tanggungjawab bersama.** Maka marilah kita jadikan bahasa sebagai jambatan, bukan tembok. Jadikan bahasa sebagai sumber kekuatan, bukan punca perpecahan. Dan jadikan bahasa ibunda sebagai **roh**

perpaduan Malaysia yang sejati.

Dengan itu, saya merasmikan **Majlis Karnival Dan
Penyampaian Hadiah Hari Bahasa Ibunda
Antarabangsa 2025.**

Sekian, Terima Kasih.